

TE HŌHŌRŌRAA API

I neia i te piha neneiraa no te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matahiti hoê.

Nu. 2.

Febuare, 1924.

Mat. 18.

*Ia riro tatou atoa nei ei taata paari, i te faaroo hoê e te
ite hoê i te Tamaiti a te Atua, ia taea te faito ra i te i o te
Mesia i te rahi. Ephesia 4: 13.*

Afea te Mau Haapaoraa e Tahoêhia'i

Te tupu nei te mana'o apî i rotopu i to te mau haapao-
raa êê i teie nei tau. Na ô maira ratou e, e mea maitai ia
tahoêhia te mau haapaoraa atoa, e ia riro ei Ekalesia rahi
hoê roa i roto i te ao nei. Area râ, no te mau haapiiraa e
te mau mana'o huru ê te tahi i te tahi e vai nei i rotopu i te
mau haapaoraa êê ra o tei rave i te i'oa o te Mesia, ua riro
ia ei patoiraa rahi roa i te opuaraa e faarirohia'i te mau
haapaoraa atoa ei haapaoraa hoê i te ao taatoa nei.

Nahea râ tana patoiraa ra e faaorehia'i? Te vai noa
nei teie nei uiraa mai te pahono-ore-hia, e ia hi'o atu i te
rahiraa o te mau fifi i haaatihia i taua opuaraa ra, aita iho
â e ravea e oti vave ai.

Te na ô maira te parau i neneihia i roto i te hoê vaa
rahi, i parauhia i te "Te Tenetere Cherisetiano": "E
mea papu ia matou e, te vai nei te hape rahi i roto i te

faatereraa i ta tatou mau haapaoraa. O te hinaaro mau ia o te feia papai, e te mau feia hoi i rave i teie nei vea, ia tauturu tatou atoa i te imiraa i te mau ravea e ore ai taua hape ra, e ia tauturu atoa hoi i te mau haapaoraa o tei papai mai no te tauturu ia ore to ratou ra mau fifi, a tahoê-ana'e-hia'i ratou ra. E ere atoa ia i te mea maere i tae noa mai ai te mau rata e rave rahi na te hoê mau orometua mana'o ahoaho e te peapea rahi, e ahiri na nehenehe, ua mauruuru rahi matou i te faaore roa'tu i te tumu no taua mau mana'o ahoaho ra. Mau noa to matou hinaaro i te hoê mau parau faaite tano e arataihia'i teie nei feia imi na te e'a tia."

Te na ô maira te hoê o taua mau rata i parauhia i mua nei o tei tae atu i taua vea ra: "Ua tai'o vau i ta outou vea faufaa, no nia i te parau o te mau Ekalesia. Ua fatata hoi matou i te ineine no te amuiraa atu ia outou na i teie nei, tera râ e rave matou i te reira-mai te tia e te hau. Ua peapea-atoa-hia matou, nahea râ e faarue i ta matou mau haapaoraa, oia hoi, ia vai tatara-noa-hia matou i te reira, eaha hoi matou i ta matou moni aufau tauturu? E nehenehe anei ia outou ia faaite mai i te ravea e ite ai matou i taua mau mea ra, e aore râ, te vai na anei te hoê atu â mau parau haamaramarama i ô outou na ia nehenehe ia tauturu mai. Mai te mea e, eita e nehenehe ia tahoê i na Ekalesia e piti nei, e faatia iho â ia e mea taa ê te tahi i te tahi, area râ, te hinaaro mau nei au ia tahoêhia ta tatou na Ekalesia nei. Ua tia hoi ia'u ia ere au i ta'u ohipa ia faatupu mai ai i teie nei mea. Atira noa'tu te reira na para te varua, tera râ, nahea tatou e haamata'i. E mea tia anei ia tamata i te annui i te hoê atu â mau parau i te faatiaraa tahito ra? E mauruuru roa ia matou no te hoê mau parau tauturu, ta outou e horoa mai no nia iho i teie nei ohipa rahi."

Tera ia te pahonora na taua vea Te Tenetere Cheristiano i taua uiraa i uihia maira: "Aita matou i ite." Aita

atoa oia i faaite atu i te hoê noa iho ravea e faaafarohia'i te ohipa aufauraa moni; e no te roaaraa mai te mau orometua; e no te huru o te Ekalesia i mana'ohia e faatupuhia'i na roto i te tahoêraa. E eita atoa hoi taua mau ohipa fifi ra e faaafarohia e tae noa'tu i te itearaa e te faaoreraa i te tumu mau i faatupuhia'i teie nei mau haapaoraa êê e rave rahi roa o te patoi noa nei te tahi i te tahi.

Na te hoê orometua tuiroo rahi no te Porosetani i te tau matamua i Amerika i faaite papu mai i te tumu i rahi ai te mau haapaoraa i parauhia i te Cherisetiano, e i te tumu atoa no te mana'o papu ore e te turoriraa i iteahia, e te rahiraa o te mau fifi e te tapitapi tei patoi noa i ta ratou tamataraa tia i te faatupu i te mana'o rotahi e te hau i rotopu ia ratou. Oia te upootia no te hoê haapaoraa Porosetani i parauhia i te Ekalesia Bapetizo, e o Roger Williams to'na i'oa, e faarue atura oia i to'na tiaraa no taua mana'o papu no'na ra. Te na ô maira taua orometua Porosetani ra: "Aita e hoê Ekalesia i nia iho i te ao nei i faatiahia i te tia e te au, e aita atoa e hoê taata i haamana-mau-hia no te raveraa i te ohipa Evanelia e te faatiaraa i te mau oroa mo'a no te Ekalesia Mau; e eita atoa terâ e iteahia e tae roa'tu i te taime e maitibia'i e e tonohia'i e te Upootia Rahi Mau no te Ekalesia te tahi mau aposetolo api, e te tia i noa nei au i to ratou taeraa mai."

Ia ite papu-hia e ia fariihia teie tumu no te amahamaha e te mana'o patoi e te mârô i rotopu i te mau haapaoraa Cherisetiano; e ia fariihia te parau mau e, tei ia Iesu Mesia ana'e iho, Oia te tumu o to tatou ora, te mana no te faatiaraa i Ta'na Ekalesia i rotopu i te taata nei; e ia faaea te mau orometua no te mau haapaoraa i te haavare noa ia ratou iho e ia vetahi ê, mai te fa'i atu e, aore ratou i haamanahia e te Atua ia rave i te ohipa i roto i te i'oa o Iesu Mesia, e no te faatiaraa i te mau oroa mo'a i roto i Ta'na

Ekalesia; e ia farii ratou i te parau-tia e te haapiiraa i roto i te Bibilia, tei faaite papu mai e, ia maiti-mau-hia e ia haamana-mau-hia e te Atua te taata e rave i te mau ohipa mo'a no te Evanelia e tia'i; ei reira mau e matara'i teie nei mau fîfî no te faatiaraa i te hoê noa iho Ekalesia Cherisetiano rahi rotahi i nia i te fenua nei.

Ia faatia-mau-hia taua Ekalesia rotahi ra, e parauhia ia i te Ekalesia a Iesu Mesia.

E vai hoê â huru hoi te mau haapiiraa e te mau oroa i roto i taua Ekalesia ra e i to te Ekalesia i faatiahia e te Mesia i to'na anotau i nia i te fenua nei.

E i roto hoi i taua Ekalesia ra e iteahia'i te mau apose-tolo, te mau peropheta, te mau tiaï, te mau orometua, te mau haapii Evanelia, te diakono e te tahi atu â mau toroa tauturu faufaa rahi no te faatereraa i taua Ekalesia ra.

Eita roa hoi e tupu te uiraa: nohea mai te moni e oti ai te mau ohipa no te pae tino, e eita hoi e tupu te uiraa: na vai râ e farii i te moni aufau, e aore râ, nahea, e na vai hoi e haapao i te aufauraa'tu i taua moni ra. Ua haapao-maite-hia teie mau mea atoa nei, e ua au maitai i te ture a te Atua ra.

Eita roa e tupu te uiraa i roto i taua Ekalesia ra no nia iho i te huru o te ohipa no te tahi toroa e te tahi toroa, noa'tu te rahiraa o to'na ra mau melo, e noa'tu te rahiraa o te mau tufaa ohipa, e vai matara noa te mau vahi atoa mai te au maitai te tahi i te tahi, no te mea e, no ô mai ia taua faatereraa ra i te Atua.

Eita atoa te mau orometua e a'o atu no te moni e te taimê faaauha, e riro râ te mau taata haapao ei Tabu'a e ei tavini no te mau taata, ei taata a'o e ei orometua no te parau-tia; e e roaa atoa i te mau vahine haapao maitai te ravea e rave ai ratou i te ohipa i roto i taua faatereraa hape ore ra.

E i roto i taua Ekalesia ra, e farerei te taata ona rahi, te taata moni rii, te taata paari, te taata haapiihia e te

taata rave ohipa noa mā te faito hoê ra, e ma te aroha taeae hoi, e e haapii ana'e ratou ma te faito hoê i te parau mo'a na te Atua no te oaoa mau, e no te ora mure ore, e i te ravea e tae ai ratou i mua.

Eita hoi te feia vêvê i roto i taua Ekalesia ra e ere i te mau mea e au ai; eita hoi ratou e atihia i te maa ore e te ahu ore e te fare ore ia tapoihia ratou ra, no te mea e e haapaohia te mau ravea atoa e faaorahia'i te pae tino e te pae varua o te mau taata e hope roa'e ra.

Oia hoi, e fa'i pāpū atu to taua Ekalesia a Iesu Mesia ra, oia te Ekalesia tahoê no te ao taatoa nei, i te Metuarāa o te Atua ra, mai te haapao mau i te taeāeraa o te taata e hope roa'e i te ao atoa nei.

Tei nia iho hoi taua Ekalesia ra i te ao nei i teie nei; oia tei faatiahia e te Atua te Metua Mure Ore raua o Ta'na Tamaiti o Iesu Mesia; e na roto mau i te māna o te Torutahi i haamanahia'i te taata i roto i taua Ekalesia ra no te raverāa i te mau oroā mo'a atoa no te Evanelia nei. Ua faaitēhia ia Iosepha Semita e te Faaora iho te tia e te faufaa no to te Ekalesia faatia-raa-hia na roto i te beheurāa no ô mai i te Atua ra, a na ô mai ai Oia e, e mea faufaa ore te mau mārōraa a to te mau haapaorāa atoa i mua i To'na ra aro.

E imi noā to te mau haapaorāa êê atoa ra i te tahoêraa, e ore roa ia e itea mai e tae noa'tu i te tau e ite pāpū ai ratou e e farii pāpū ai hoi i te māna o to tatou Faaora; e ma te manuia ore hoi e imi noa'i ratou i te māna i vai na ia ratou i mutaaihora i nia iho i te mau tamarii a te taata nei. E vī mau hoi ratou i ta ratou tama'irāa mai i te Ekalesia a Iesu Mesi, oia tei faatiahia ia tupu noa'tu i te faaāraa i te ao atoa nei; e tae noa'tu hoi, "ia tuu te mau turi atoa i raro, to te ra'i, to nia i te fenua e to raro a'e i te fenua i te i'oa o Iesu ra; e ia fa'i te mau vaha atoa e, o Iesu Mesia te Fatu, e hanahana'tu te Atua Metua ra."

—*Faaauhia e Elavana*

Te Hoê Parau Iti ei Faaitoitōraa

(Tuatiraa teie nei parau.)

Te Feia o tei Tamau Maite i te Faaroo e te Ohipa i Roto i te
 Basileia o te Atua e tae Noa'tu i te Hopea ra, ei Roto â
 Hoi Ratou i te Basileia o te Ao ra, e tei ia Ratou
 - Ra hoi te Ora Mure Ore.

41. Te faaite pāpū mai nei te mau peropheta e te mau
 tavini o te Fatu ra, e o te feia atoa: "O tei faaroo" i te
 Evanelia ra; e tei "tatarahapa" i to ratou mau mana'o
 iino ra; e tei "bapetizohia" i raro i te pape e te tavini mau
 o Iesu Mesia ra:

42. E tei "tuuhia e te rima" o te feia toroa o te
 basileia o te Atua ra, no te horoaraa i te Varua Maitai ra;
 "e tei rave tuutū ore" i te mau ohipa popou ra, mai te
 tapea maite â i te parau mau e te itoito e tae noa'tu i te
 hopea ra; tei ia ratou ana'e ia te ora mure ore ra. Mar. 16:
 16; Roma 2: 7; Mataio 24: 13.

43. E riro ai hoi ratou o te utuafare mau o te Fatu ra.
 "Area te Mesia ra, ei tamaiti ia i nia i to'na ihora
 utuafare; o tatou hoi tana utuafare no'na ra, ia mau papu
 â tatou i to tatou tiaturiraa, e te tiairaa oaoa ra ma te
 itoito e tae noa'tu i te hopea ra." Heb. 3: 6. No ratou hoi
 te basileia, e a muri e a muri noa'tu.

"O te feia mo'a râ no Tei Teitei ra te rave i tana
 basileia nei, e no ratou roa'tu te basileia, e a muri, e a
 muri noa'tu." Dan. 7: 18. A hi'o atoa i te Timoteo 2, 2:
 12. Apokalupo 2: 26-27.

Teihea te Basileia o te Atua i Nei i te Fenua Nei?

44. Teie ia ta tatou uiraa rahi i roto i teie nei parau.
 Teihea ia te basileia o te Atua i nia i te fenua nei? Ua
 hanere te mau haapaoraa i roto i teie nei ao, e mea huru ê
 rii te tahi i te tahi. Te parau mai nei te hoê haapaoraa e,
 E tino to te Atua; e te na ô maira hoi te tahi e, Aita ona e
 tino.

45. Te faaite noa'tu nei te hoê ekalesia i ta'na parau, i te na ôraa'tu e, Te heheu noa mai nei â te Atua i ta'na parau i ta'na mau aposetolo ra, e i ta'na mau peropheta ra i teie nei anotau ra; e te pahono mai nei te tahi i te na ôraa mai e, Aita e Atua e na reira. Ua faaorehia te toroa aposetolo e te toroa peropheta i te tau tahito ra. Ua navai te parau i papaihia i roto i te bibilia nei e ora'i te taata'toa nei. Eita te Atua e parau faahou mai i te taata nei; ua oti te ohipa heheuraa parau.

46. Te tohu nei te peropheta o te tau hopea nei, ma te faaite noa mai i te parau heheu apî no ô mai i te Atua ra; e te parau hua maira te mau haapaoraa e rave rahi ra, na ô maira, Eiaha e faaroo i taua taata rave auru ra; Ua faaorehia te tohu.

47. Te na ô mai nei te tahi haapaoraa, E pee te mau tapao (Mareko 16: 17-18;) i te feia faaroo mau ra; e te patoi atu nei te tahi haapaoraa i te reira parau, i te na ôraa atu e, e ore te mau tapao e pee i te feia faaroo i teie nei anotau hopea nei; no te faatiaraa o te ekalesia i te matamua ra taua mau tapao i parauhia maira; eiaha no muri atu; na faaorehia te reira huru ohipa i te tau tahito ra.

48. Te mana'o nei te hoê haapaoraa e mea tia i te apooraa ekalesia ia hamani i te mau ture o te ekalesia ra; e te parau mai nei te tahi haapaoraa, Eita e tia; na te Atua ana'e iho taua ohipa ra; tei ia'na iho te faaau i te mau ture no te feia mo'a ra.

49. Te parau mai nei te tahi e, e mea tia ia baptizo atu i te tamarii aiû; e te haapii mai nei hoi te tahi, Aita e tia.

50. Te parau atu nei te tahi e, o te faufaa o te baptizo ra, o te faaoreraa hara ia; e te pahono mai nei hoi te tahi, E ere, e tapao râ te baptizo, no te faaôraa i te taata, e aore râ i te aiû, i roto i te ekalesia ra.

51. Te faaea nei to te tahi ekalesia i ta ratou mau ohipa atoa i te sabati, i te mahana matamua no te hepedoma ra; e te haapii noa mai nei hoi te tahi haapaoraa, i te na ôraa mai e, ua hape ia te reira. O te mahana maa nei, oia hoi te mahana hitu o te hepedoma ra, e sabati mau ia.

52. Te haapii noa nei te tahi mau haapaoraa, i te na ôraa e, ua haere tino maira te "Faaora", (oia hoi o Iesu) i

tohuhia e te mau peropheta tahito ra, e ua faasataurohia ra, e te parau mai nei te tahi ekalesia ra, na ô maira, Eiaha roa ia; ei te hopea ra Oia e tae mai ai.

54. Te haapii atu nei te tahi haapaoraa, i te na ôraa atu e, O Iesu Mesia te Arii; ei nia roa iho ia oia i teie nei ao e te mau mea atoa i roto ra; e te pahono mai nei te tahi i te na ôraa mai hoi e, E ere. Ei te hopea o teie nei ao Oia e faatoroahia'i ei arii.

54. E na reira hoi i te mau parau rarahi e rave rahi ra, te faahapa noa nei te parau o te tahi haapaoraa i to te tahi. E ere râ te Atua i te tumu o te parau mârô ra. E tapao papu teie ua anohia te parau a te taata e te parau o te Evanelia i roto i te mau ekalesia. Teihea râ ia te basileia mau ra?

55. Mai te mea ra e, ia hopoi mai te hoê taata i te hoê i'a (te auhopu) i mua i to tatou aro ra, e a ui mai ai ia tatou e, Eaha te i'oa o teie nei i'a; e mata na tatou i te hi'opo'a i te huru o te afii, te itere, te mau pehan, te mau poa, te vaha, te mata, to'na aano e to'na roa, e te huru o to'na mau melo atoa ra; ei reira tatou e pahono atu ai, i te na ôraa'tu e, e auhopu mau ia teie nei i'a.

56. Ei reira râ, ia hopoi faahou mai te taata i te tahi atu â i'a ia tatou nei, e hi'opo'a maite â hoi tatou i to'na afii, te itere, te mau pahau, te mau poa, e te huru o to'na mau melo atoa ra; e mai te mea râ e, hoê â ia to'na huru i to te i'a i faaitehia maira, ua itea-papu-roa-hia ia e, o te auhopu mau hoi ia teie. Mai te mea râ, e huru ê to'na i to te i'a i faaite-noa-hia maira, ua itea-papu-roa-hia hoi ia e, e ere teie i te auhopu; te tahi atu â i'a ê.

57. E na reira hoi tatou i te imi i te basileia o te Atua. A hi'o na tatou i te huru o te ekalesia i faatiahia i te tau o te Mesia e ta'na mau aposetolo ra, e ia itea ra, a imi hua hoi i taua huru basileia ra i rotopu i te mau haapaoraa e vai nei i roto i teie nei ao, a tomo ai i roto ra, e a rave puai ai i te mau ohipa maitatai atoa ra ma te tamau maite e tae noa'tu i te hopea ra.

"E mata na râ outou i te imi i te basileia o te Atua, e te parau-tia na'na; e e amui-atoa-hia mai taua mau mea ra ia outou." Mataio 6: 33.

E tuatihia teie nei parau

Te Mau Parau Apî Radio

E toetoe rahi roa to te paeau i te hitia o te râ o Amerika.

Te imi ra to Beritane i te ravea e tere faahou ai te ohipa hoo i rotopu ia Beritane e Rusia.

Hoê pahi opupu na te reva o to Amerika i roohia'toa i te ati, e 30 hoi rahiraa taata i nia iho.

Ua haamaitai to Tapone i to Amerika no te tantururaa ia raton i roto i to ratou ati fuito ore.

Te puai noa ra te aroraa i Mexico i rotopu i te Huiraa-tira Paniora iho, e te mau taata orure hau. Ua motumotu roa râ te nuu orure i te nuu hau iho, eita e maoro e roo mai te parau e, ua vî roa taua mau nuu orure hau ra.

Faaiteraa no Ruru

Ia hinaaro outou i te tape'a, e te uati, noa'tu te huru;
Ia hinaaro outou ia hamanihia to outou mau tape'a, te pine, te tautau;
Ia hinaaro outou ia tataihia to outou mau tape'a;
Ia hinaaro outou i te hoo mai i ta outou mau tiko, te patoetoe, te mau tape'a tahito, te hei pupu, etc.;
Ia hinaaro outou ia papaihia to outou mau i'oa i nia e aore râ i roto i to outou mau tape'a, te pine, e te tautau;
Ia hinaaro outou ia faaapîhia to outou mau tape'a tahito;

Haere i o Ruru

to'na iho â fare parai rea ute
te aroa Petite Pologne

PAPEETE

Ua Neneihia Anei To Oe Hoho'a

Aita'tu e tao'a nehenehe e te faufaa hoi i te hoho'a—no oe iho, no te tane e te vahine, no te aiû apî, no te metua ruau, e aore râ no te utuafare.

E tei te fare neneiraa hoho'a a Viriamu te mau ravea apîe papu roa'i e e nehenehe roa'i te mau huru hoho'a—i te moni māmā hoi.

Eiaha e tia i noa—haere râ i teio nei, no te mau hoho'a ta oe i hinaaro.

William Crake

I pihaito i te Fare Moni Initia Taina
PAPEETE

Taihaa Api

No nia mai i te pahi Farani.
Ua rau te huru o te AHU,
te MAA PUNU, MONAMO-
NA, e te tahi atu â taihaa
nehenehe.

Maere Mai e
Mataitai

Fare Toa No Aiu.

FARE TAMAARAA TINITO

I Tatahi tei fatata i te fare toa no Pute

Teie te Hooraa

Te mau roi auri, roi raau, roi veo;
Te mau afata ume, afata roa, afata
raau noanoa, afata ma'i (pohe);
Te mau huru UPAUPA, Mando-
line, Guitare, Ukulele, e to'na
mau niuniu atoa;

Te mau huru peni vaa, Fare, Pere-
oo, Afata Ume, e te tahi atu â.
Tei reira'toa hoi te hamani raa e te
tatairaa i te mau huru haneti atoa.
Tei reira'toa te mau hahu raa, e te
êê raa raau.

Tei reira'toa te tarahu raa Pereoo
uira; taniuniu noa io Bambridge,
Papeete, ia tae atu te Auto, no-
a'tu te hora i te pô e te ap.

Bambridge, Dexter & Co.

oia hoi io TIHOTI MAEHAA

Te vai ra i mua i te to'a a Ruru te parau api RADIO
i iritihia na roto i te re'o Tahiti.

Ua iteahia e te Farani ratere te hoê e'a ohie roa no te
pereoo uira na roto i te medebara Sahara.

I te 23 no te avae Tenuare i reva mai ai na Farani te
pahi Farani i te o' "El Kantara".

E manuiaraa rahi mau to te tereraa pahi na roto i te
oo'a i Panama, te rahi noa'tura te pahi e na reira te tere,
e e rahi roa'tu hoi i teie mau matahiti i mua nei.

Ua pohe roa o Lenine te Peresideni no te Paeau Rusia
patoi i te faatereraa tahito. E heva rahi to te Rusia taatoa
ia'na, e faahanahanabia ihora hoi oia.

Hoê taata toroa rahi no Polane, i Amerika i faahoihia i to'na fenua no te itea-raa-hia e te feia toroa te ava i roto i to'na fare i Amerika.

Ua tupu te hoê ati mata'i e te miti rahi roa i nia i te mau fenua motu (moana) Mallive, e 4 pahi i parari e rave rahi te taata aore e utuafare faahou.

Ua tae hoi ta te Hau Farani pahono i ta te Hau Purutia aniraa mai ia farii-atoa-hia oia i roto i te Apooraa Hau Amui e i ta'na hoi patoi no te puhaparaa te Farani e te Beletita i nia i te fenua Purutia.

No te vî ore o Poincare Peresideni no Farani i te mârô a te Purutia, ua ani mai to Purutia e, e tia i e piti hepedoma no te feruri-faahou-raa. Eita roa'tu o Poincare e faatia ia faahuru-ê-hia e hoê iti noa'e te parau e te utua i oti ra. Ua tiaturi roa hoi te Beritane e e marû rii o Poincare.

Ua Faaroo Tatou

I te parau apî o te tau i o te moni Marite e te moni Beritane—e no reira ua pee te moni o te mau taihaa i nia.

Mea Mama ta Pute

Aita râ te moni o te pua i te faretoa a Pute i haere i nia, no te mea no Tahiti iho nei te hamani-raa-hia.

Hoê Noa Iho Afa i te Pâ

A. Leboucher

PAPEETE

Tamuta Hamani Pahi e te Fare

Mai te mea e, te opua nei oe i te hoo i te tahi poti tere roa-a'e i te tahi atu â mau poti, haere io PERO, oia hoi, F. R. & I. E. WALKER, na ratou e hamani i taua poti ra ma te maitai e te hoo māmā.

Haere na a mataitai i ta ratou mau hoho'a poti, haere na a mataitai i ta ratou aua hamaniraa pahi.


Farerei na ia PERO ma, no te hamaniraa i to oe fare, eita oe e tata-rahapa.

Afai na ta oe mau iri raan i hinaro i te êê e te hahu ia PERO ma, na ratou e rave.

F. R. & I. E. WALKER

PAPEETE

Na Reno e Hamani i Te Pereoo



Tei ia'na te mau ravea apî. Noa'tu te mea i pararî,
Afaï mai i to outou pereoo na Reno e hamani e faaeta-
paruparu. eta faahou.

Te hamani atoa nei Reno i te mau mea atoa i pararî
—noa'tu te mea—noa'tu to'na huru—afai mai.

N. C. REYNOLDS, oia **RENO** tane

Tei te fare neneiraa hoho'a a Viriamu i tai a'e i te toa
a Tihoti Maehaa e te fare moni, te fare toa e te
hamaniraa pereoo taataahi a Reno i teie nei.

Ua tiaturi roa iho â te mau Tomite o te Apooraa rahi
faaterehau Farani i to ratou Peresideni faatere, oia hoi, o
Poincare tane, te taata vî ore i te Hau Purutia e i te hinaa-
ro o te mau hau huru ê. E 360 tomite i roto i te Apooraa
Farani i faatia roa i te mana'o o Poincare, e 15 i patoi atu.

Ua tae i Amerika, ta te Hau Tapone parau patoi i te
opuaraa a te Hau Amerika, e iriti i te tiaraa taata Amerika
no nia i te Tapone e fanau i Amerika. Te ani maira te
Tapone e, e na reira'toa anei to Amerika i te mau hau i
riro ei hoâ mau no Amerika. Ua huru inoino roa to Tapone,
ei haafaitoraa i ta Amerika ture opani i te hoo fenua i te
mau taata Tapone.

O. B. Peterson, Imprimeur,
Rue Brea et de la rue Dumont d'Urville, Orovini, Papeete